

tum quoque marmorea caput a cervice reuulsum
 gurgite cum medio portans Oeagrius Hebrus
 uolueret, Eurydicen uox ipsa et frigida lingua, 525
 a miseram Eurydicen! anima fugiente uocabat:
 Eurydicen toto referebant flumine ripae.'

Haec Proteus, et se iactu dedit aequor in altum,
 quaque dedit, spumantem undam sub uertice torsit.
 at non Cyrene, namque ultro adfata timentem: 530

'nate, licet tristis animo deponere curas.
 haec omnis morbi causa, hinc miserabile Nymphae,
 cum quibus illa choros lucis agitabat in altis,
 exitium misere apibus. tu munera supplex
 tende petens pacem, et facilis uenerare Napaeas; 535
 namque dabunt ueniam uotis, irasque remittent.

sed modus orandi qui sit prius ordine dicam:
 quattuor eximios praestanti corpore tauros,
 qui tibi nunc uiridis depascunt summa Lycaeï,
 delige, et intacta totidem ceruice iuuenas. 540

quattuor his aras alta ad delubra dearum
 constitue, et sacrum iugulis demitte cruorem,
 corporaque ipsa bouum frondoso desere luco.
 post, ubi nona suos Aurora ostenderit ortus,
 inferias Orphei Lethaea papauera mittes 545

et nigram mactabis ouem, lucumque reuises;
 placatam Eurydicen uitula uenerabere caesa.'
 haud mora, continuo matris praecepta facessit:
 ad delubra uenit, monstratas excitat aras,
 quattuor eximios praestanti corpore tauros 550
 ducit et intacta totidem ceruice iuuenas.